

四庫全書

集部

欽定四庫全書

集部

粵西叢載卷二十六至
二十八

詳校官庶吉士臣瑚圖禮

主事銜臣徐以坤覆勘

總校官庶吉士臣朱 鈐

校對官助教臣羅萬選

謄錄監生臣劉家瑛

欽定四庫全書

粵西叢載卷二十六

桂林府通判汪森編

明朝馭蠻

株學海
通志

明太祖洪武元年秋七月乙巳廣西左江太平府土官
黃英行右江田州府土官岑伯顏等遣使齎印章詣平
章楊璟軍門降思明路土官黃忽都亦齎印章詣軍門
納款受約束以歸

冬十一月丙午遣中書照磨蘭以權齋詔諭廣西左右
兩江谿崗官民

二年七月中書省臣言廣西諸洞雖平宜遷其人內地
可無邊患上曰溪洞猺獠雜處其人不知理義順之則
服逆之則變未可輕動惟以兵分守要害以鎮服之俾
日漸教化則自不為非數年之後皆為良民何必遷也
三年八月湖廣行省平章楊璟等還自廣西入見上問
兩江黃岑二氏所轄情形璟言蠻獠之人性習頑獷散

則為民聚則為盜難以文治當臨之以兵彼始畏罪上曰蠻夷之人性習雖殊然其好生惡死之心未嘗不同若撫之以安靜待之以誠意諭之以道理彼豈有不從化者哉此所謂以不治治之何事於兵也

秋九月上思州首蠻黃龍關作亂命潭州指揮同知丘廣為總兵官寶慶衛指揮僉事胡海廣西衛指揮僉事左君弼為副率兵討之龍關一名英傑英傑陣死弟英覽俘斬餘悉撫定

是年治上思州土官黃英衍罪編管泰州前元至正十
九年己亥英衍乘元季亂聚兵據太平路奪印行總管
事劫遷兵民於馱盧建治垂十年洪武元年秋七月平
章楊璟等取廣西以兵徇左右江英衍懼遣使奉印納
款按罪當誅以乞降貸死舉族移泰州改太平路為府
銓流官知府治之

三年十月己巳廣西向武州土官黃世鐵父志威來朝
貢馬及方物

是年廣西諸蠻叛行中書省參知政事蔡遷討平之
四年廣西谿峒蠻獠亂廣西衛指揮左君弼等討平有
功命賜弼帛綺二十疋千戶蔡天祿以下四人有差
是年柳賓蠻賊攻劫融縣柳州衛指揮蘓銓率兵奮擊
賊敗後復聚衆剽掠銓設法擒之自此畏服不出民賴
以安

是年大藤峽峒蠻聚衆攻劫郡縣柳州衛指揮于海率
兵奮勇長驅賊潰搜勦殆盡一方遂安

五年正月上以古州思州澧州等處洞蠻嘗梗化作亂命衛國公鄧愈為征南將軍江夏侯周德興江陰侯吳良為副將軍討之愈率棗陽侯楊璟宜春侯黃彬出澧州德興率南雄侯趙庸指揮僉事左君弼出南寧良率平章李伯昇出靖州三道並進

是年命韓觀為廣西桂林衛都指揮僉事與世襲時象州等處叛賊勢焰方熾觀率官軍擊之賊敗走有潛匿謀再舉者掩而殲之威懾蠻獠邊境寧謐

吳良率兵深入征左右兩江諸州蠻酋數月平其地俘獲不可勝計

五月吳良移兵勦五谿蠻悉殲厥衆良猶欲懷之以恩

德招附納降古州八萬

古州今懷遠縣屬柳州府

乃懼而降曰崙曰

寨凡二百餘所編戶附籍願為之氓郡境寧謐

九月周德興等討婁鳳安田等諸洞悉平之遂克泗城

州

六年六月辛未江夏侯周德興言田州土官總管黃志

威招撫奉議等州一百一十七處蠻人皆來款附上嘉志威招撫之功命以安州侯州陽縣屬之

八年楊文調桂林左衛屯軍陳華四糾合徭人李季九等為亂即領旗軍直抵平樂府谷塘等村勦捕之後平象州武仙叛賊

十四年賓象潯諸谿尚蠻賊剽掠沿邊廣西指揮徐玄領兵進擊破白崖小藤擒殺賊韋公廣等數百餘人皆竄入溪谷玄乃抱石登崖為士卒先倍道直抵巢穴擊

破崖崗數十寨擒賊八百餘人

十六年東蘭那地賊犯邊廣西指揮徐玄領兵擊之斬首千餘級平砦二十四

十七年閏十月象州土吏覃仁用言其父景安故元時嘗任本州巡檢有兵糧二百人今皆為民請收集為軍上不許

十八年六月廣西都司言頻年徭寇竊發皆因居近溪洞之民與之相通誘引為患請先捕戮此輩庶絕其黨

上曰溪洞之民引誘猺獠為寇此誠有之然其間豈無良善若一槩捕戮恐及無辜大抵馭蠻獠之道惟當安近以來遠不可因惡以累善非實有左驗不宜捕戮

二十年六月潯州知府沈信言府境接連柳容梧藤等州山谿險峻猺賊出沒不常實為民患臣愚以為桂平平南二縣舊附猺民皆便習弓弩慣歷險阻若選其少壯千餘人免其差徭給以軍器衣裝俾各團村寨置烽火與巡檢司民兵相為聲援協同捕逐可以殲之上曰

蠻獠梗化彼習然也使守土之官能招徠之何用殺戮
若無事但當謹其防禦使不為患耳苟其為寇不已民
有不堪則發兵討之何必圍寨

二十八年龍州土官趙宗壽等叛命左都督楊文等率
軍討之時上命楊文佩征南將軍印為總兵官廣西都
指揮使韓觀為左副將軍都督僉事宋晟為右副將軍
劉真為參將率京衛精壯馬步官軍三萬人至廣西會
各處軍馬總十五萬討龍州土官趙宗壽等宗壽上章

言狀上詔下吏議既而以蠻獠遠人俱釋之至是復有人告常茂匿龍州見未死前宗壽所言皆妄遂命右軍都督府榜諭宗壽及其官民人等尋發大軍討之

是年奉議州等處土官作亂詔楊文移兵征之時兵部尚書唐鐸還京言宗壽伏罪來朝乞罷兵征乃詔楊文移兵征奉議等處仍命鐸至軍參議軍事於是奉議州土官黃世鐵南丹州土官莫金及都康向武等州土官皆作亂都督楊文等以九月率大軍至龍州既降宗壽

遂移師諸州十月師至奉議斬黃世鐵臬首以徇分軍
勦向武都康等州擒斬蠻衆至鎮安府撫定土官岑志
綱即徵其土兵抵龍英州防遏賊衝尋獲土官黃嗣隆
斬之復攻進南丹州土官莫金奔遁殺其子莫萬和擒
莫應臺等械之軍中諸軍追至永州斬獲莫金并大藤
峽等關寨擒殺幾二萬招諭復業者六百餘築城開設
奉議南丹潯州慶遠四軍民指揮使司向武河池懷集
賀縣四守禦千戶所以鎮守之所獲糧牛就給新立衛

所以領屯種二十九年班師

三十五年柳州等處蠻民嘯聚劫掠遣禮部主事李宗輔等賫勅往赦其罪諭令復業如執迷不悛調兵勦除成祖永樂二年思明府知府黃廣成奏先臣故地祿州西平州永平寨被安南侵據乞天恩諭使歸還上納之八月荔波縣民覃真保奏八十二洞徭民願隸編籍乞遣使招撫命都督韓觀遣人撫諭願為民者復徭役三年

三年二月遣兵部尚書徐子良等諭柳州武宣洛容二縣民黃田等及荔浦縣民廖均用等各復原業永為良民若怙終不悛調軍蕩除

韓觀奏桂平縣蠻民為亂請發兵剿捕上勅諭撫安不許發兵

十二月平樂蠻賊莫彥恭等聚眾劫殺良民都指揮葛森奉命剿平之

五年述昆等鄉首賊韋公本等作亂都督韓觀等率兵

討平之

十九年宜山首賊韋萬皇等叛僭稱王侯糾馬平三五等都賊攻劫州縣殺死御史諸璞奪其印命征蠻將軍鎮遠侯顧興祖率大軍討之興祖帥湖廣貴州廣西三省之兵先勦永福以通道諭降荔修諸賊以携其黨執偽通天侯韋萬賢廖用等百餘人斬之餘皆奔潰明年擒首賊梁善總等獲御史印二十一年賀縣樊家屯賊起二十二年平賀二縣並起宣德二年富川縣賊廖六

把又起興祖先後討平之

二十一年宜山思恩河池等縣徭賊復亂征蠻將軍鎮遠侯顧興祖分兵擊之

宣宗宣德三年太平府崇善縣土官趙暹以兵逼府境為亂太平守禦千戶所趙欽鄭忠等率軍禦之敵敗走事聞下督府遣官計擒暹誅之赤其族改銓流官

四年四月廣西總兵山雲討柳潯二州寇并誅其從寇二千四百八十人梟首境上以徇歸寇所掠軍民男婦

四百四十六人以聞上謂尚書張本曰蠻性克悍其死皆自取今瘴癘之時宜速令雲息兵有未服者遣人招諭若能順服亦可寬貸

五年十一月山雲出師討慶遠蠻寇斬首七千四百平之

英宗正統二年正月廣西總兵山雲等奏泗城州土知州岑豹攻奪利州知州岑顏地方并掠其妻子財物雖朝廷屢遣官撫諭而負固不服增兵據守乞量調官軍

勅之上勅雲遣人諭其輸款如不悛即加勅滅

五月山雲奏柳州懷遠縣板江等寨蠻寇韋潮振等一千七百餘徒嘯聚行劫恐滋蔓為患宜調兵勦之上勅雲撫諭

六年桂平等處地方弗靖勅總兵等官撫安之

七年首賊韋萬皇餘黨為亂詔思恩府土官岑瑛撫治之先是萬皇等作耗命總兵官鎮遠侯顧興祖統大軍抵巢勦捕各賊聞風奔入山林潛住班師後復出為害

宜山縣知縣朱斌備以前項作耗地方奏准撥與岑瑛
管治

九年桂林等府修仁等縣蠻作亂命安遠侯柳溥為總
兵官討平之

十年宜山述昆等鄉首賊韋萬秀作亂寇河池所驛鎮
總兵官柳溥討平之

正統間萬承思同結倫結安羅陽等州土蠻出沒剽掠
鄉邑那樓寨義勇陸懋率鄉民擊之十二年六月僉舉

懋功奉勅合授本寨土副巡檢世襲

十四年蠻賊竊發思明府官族立溫衛土官指揮黃玠思恩土官知府岑瑛各以兵隨征蠻賊畏之

是年副總兵都督武毅既平廣東叛賊黃蕭養旋師在途牌招修仁荔浦等處首賊數百悉赴撫諭回巢各縣地方相連稍安

景帝景泰元年二月富川等處民徭妖亂都督田真遣官勦平之時富川縣靈亭鄉下設源徭人盤姓子糾冷

水諸源徭人廖八子湖廣江華永明二縣民徭王茂何
音保等妖言惑集千餘人屯八尺溪偽稱勝道君王名
號征蠻將軍都督田真遣指揮葛宗蔭率兵進勦以參
政錢兵僉事鄭觀監之三月二十八日破巢斬首六百
六十有奇俘獲男婦九百八十餘口撫餘黨平之

秋七月副總兵武毅招立山荔浦修仁等處蠻賊出降
江路漸通九月內武毅孫麒等五路出兵截之斬首七
百餘賊頗斂迹

二年思明府黃鈺弑其父瑯提督侍郎李棠等誅之
是年馬平賊韋朝天等寇桂林境

三年宜山賊韋萬秀等流劫不息參將孫麒斬賊級一
百五十參將范信殺獲大藤峽等處賊首侯通三等二
百三十有奇蠻寇遁散

四年總督都御史王翱檄廣東僉事李觀智撫五屯龍
山諸賊平之

五年四月宣化盜起劫南寧府初南寧指揮僉事左君

弼覈民之無籍者為軍又縱所部軍士入山伐木民多
驚擾遂相構為盜詔發廣西官軍討平之斬首百餘級
生擒二千八百餘人獲馬五十匹仍命大都督府按君
弼罪而禁戢其卒

英宗天順二年十一月廣西都指揮馬瑄百戶施觀死
於賊先是全州蠻糾引武岡州楊蓬等尙苗人越至全
州山川壇巖前等處為患總兵朱瑛右都督陳旺領兵
往勦兵無紀律瑄等遂為賊所殺義寧等處俱失利

四年八月藤縣民胡趙成因事充軍遇草造妖言搆集
大藤峽等山賊攻陷諸縣治燒劫衙門殺擄官民掠去
竇家寨巡司印信荼毒一方都御史葉盛督參將范信
副使雷復都指揮韓瑄督領指揮張錦王銘等官兵擒
斬成等三十三名奪回印信脇從者不治

五年述昆鄉賊為亂仍以地方改撥思恩府土官岑瑛
撫治之自都指揮彭英謝事代以黃鉞首賊韋父強等
復叛同知葉禎奮義率民兵征之鉞忌其功遣謀泄機

於賊以殺禎自是賊勢益熾府縣申議以前地方復畀
瑛治之立八仙堡以土兵千人戍焉賊稍斂

十二月葉盛同都督顏彪討大藤蠻賊督兩京漢達并
江西湖廣浙江等衛所及官軍土兵壯快人等分道夾
攻破老鼠道袍石門紫荊金龍白鶴六廟仙女關通天
嶺等巢七百二十一處擒斬首從賊徒三千二百十七
名顆燒燬房屋禾倉萬七千二百間追奪賊船五百三
隻奪回被擄男婦五百三十一名口牛馬五百二十四匹

器械五千七百一十件

七年九月廣西潯梧懷賀山賊流劫廣東雷廉高肇新會地方勅總兵官秦寧侯陳涇副總兵都督歐信巡撫都御史葉盛討之

憲宗成化元年峽酋侯大狗作亂修仁荔浦平樂立山諸徭應之兩廣都御史韓雍以永順保靖及兩江土兵十六萬五路並進先破修仁窮追至立山生擒一千二百餘人斬首七千三百餘級因遂平峽

是年上思州土官黃瑛侵南寧境殺掠無算督府委官擒瑛下獄誅之

二年大藤賊鄭昂攻陷容藤二縣殺藤縣孝子余全總督韓雍四面集兵追捕之昂伏誅

十二年徭賊蜂起修仁荔浦尤劇荔與廢立山縣故唇齒兩廣都御史朱英發桂林官軍順流而下會總府諸軍往討之英曰徭獠亦人也貪生惡死未必不同今重書屢下皆以撫綏為言終歲窮兵非朝廷意也乃下令

招撫之立山徭老李公著遣子扶寶投款乞復縣治為
編氓時參議謝綬在行間議城立山英具疏聞遂以其
地為永安州明年州治成進軍荔浦平之舉桂林推官
閉魯為知州給州民室廬勅學官祭器復葺修仁城焚
以石乃城恭城

是年天河縣首賊韋諫誠作亂都御史吳琛命將討平
之

十六年鬱林州木頭等尙蠻賊叛都御史朱英總兵官

平江伯陳銳副使陶魯等統漢達官軍土兵討平之
十八年四月馬平縣主簿孔性善言溪洞猺獞恃險竊
發殺掠吏民及官軍討捕率不能獲克頑自恣為患益
深然此雖盜賊豈無良心昔者陳景文為知縣猺獞皆
應差役厥後長吏撫字乖方始復反側誠使守令得人
示以恩信諭以禍福彼雖克頑豈不革心向化為良民
乎上納其言命吏部凡溪洞郡縣擇賢守令以撫輯之
二十年猺賊黃公定寇掠陸川副使陶魯討平之

二十二年首賊岑召管等為亂二月攻青山三月攻陶村總督檄僉事李珊等率官剿之不克弘治五年督府差官招撫奏准立永順永定二長官司管治罷戍守八仙堡土兵

孝宗弘治二年思城知州岑欽以兵破田州官軍追之遁入泗城

三年秋八月廣西土官作亂都御史秦紘奏聞勅土官鎮安府知府岑鈺東蘭州知州韋祖紘諭之

四年泗城州土官岑應作亂總督都御史秦紘等建議
征之

五年永安撞賊成萬等攻圍州治合修荔猺賊流劫府
江江道為阻都御史閔珪與伏羌伯毛銳親帥師至昭
平討之破村寨百八十所斬首六千級奪回被擄男婦
四千四百口捷聞以珪為南京刑部尚書

是年古田猺賊覃萬賢等亂襲殺副總兵馬俊參議
鉉于尤豪三厄先是萬賢等謀亂占據縣治縣官不能

入鎮守廣西太監王廉請兵討之於是三省議調漢達
官軍土兵四萬七千員名分道四哨進攻俊等一哨至
尤豪三厄伏發為賊所殺兵遂退而古田從此失矣
六年秋九月田州府土官岑溥長子猯弑溥于江中州
目黃驥等攻猯殺之

是年思明府土官黃道與忠州土官黃鏗構兵讎殺縱
其目兵侵掠南寧境土督府下當道按問之
七年修仁荔浦蠻賊叛都御史閔珪討平之

是年南京戶部員外郎周琦奏請大征古田等縣猺賊
十年十二月兩廣總制鄧廷瓚調兵征鬱林州雲壚大
桂諸種猺僮俱平之

十三年土族黃理糾遷隆崗土舍黃愷作亂殺其姪漢
滅之占據西鄉那馬等三十四村太平府知府謝湖計
捕理下獄赤其族

夏四月慶遠府述崑鄉賊攻城廂知府姜瑄率兵擊敗
之先是首賊韋七璇等越過賓州上林等縣劫掠殺指

揮王英當道檄府衛計擒七璇誅之璇妻與賊族糾賊數萬以是年四月一日猝至城西南關外圍繞數匝矢石如雨幾為所陷知府姜瑄設策備禦躬督指揮王澹彭鐸吳啟宗推官羅環等軍奮擊敗之

十四年夏四月思明府土官黃道子澄復糾黃愷子添貴兵攻州督府檄千戶朱榮捕澄斬之添貴竄于蠻崗是年天河縣首賊韋萬妙等作亂知府姜瑄督兵剿之萬妙捨父諫誠之惡流毒一方瑄調那地州土兵躬督

卷二十六
抵巢擒萬妙誅之餘黨悉定

十五年冬十一月左州土人黃金作亂伏誅

十七年思明土官自黃琮歷子震孫紹至文昌作亂凡四世總督潘蕃調副總兵歐磐率兵剿平之

十八年總督潘蕃等討思恩府土官岑濬滅之

武宗正德二年九月柳慶種賊常朝宣等肆出剽掠都御史陳金命官軍討平之

是年府江兩岸大小桐江洛口仙迴勝隴三崗等巢聯

結據諸徭皆挾短兵長弩出府江劫船殺人爲患左
都御史陳金會同武定侯郭勛調兩廣漢達官軍及土
兵六萬餘分道並進俘斬七千五百餘其地悉平

六年思明土舍黃暘冒以黃鏐保襲民訐其詐陰嗾鏐
糾遷隆黃添貴兵作亂占據剝甘等十三村

七年夏四月逆理男黃鏐寇殺州郭燬之八年復來圍
州九年春督府林檄思明府同知姚澄執鏐繫潯州獄
定年六月青賊李通寶寇掠鬱林北流陸川岑溪州縣

知府曹琚偕參將李鍾調容縣千戶所覃德玉捕之殺
通寶於洞心山

八年尚賊何海何受與四尚等處夷人作亂思隆民余
鎰奉委率兵平之督府奏設巡檢司欽賜銅印與鑑世
襲馱演寨土巡檢

一年三月先是府江東西兩岸大小桐江洛口仙右
曰茂田冲斷藤峽朦朧三黃等處村巢接壤路道崎嶇
百齒相聳聚衆糾合劫掠殺人久為府江之患總督陳

金督調兩廣漢達官軍土兵分為六大哨行兩廣按察使宗璽布政吳廷舉副使傅習張佑參議張九達參政蔣曙副總兵房閏鎮守大監傅倫參將牛桓張祐陳義都指揮魯宗貫王英鄭綬戴儀統領水陸並進俘斬七千五百六十九名顆餘黨悉平

是年左都御史陳金通斷藤峽改名永通峽

十三年秋八月田州府土官岑猛以兵襲龍州

十四年古田徭亂提督都御史蕭紳總鎮太監王堂總

兵官撫寧侯朱麒討之竟從招撫而罷

是年封川徭盤古義糾合賀縣上下向諸徭大肆流劫
戕殺官軍焚燒廬舍蹂躪剽掠民無寧居右都御史蕭
紳調集漢達官軍士兵萬餘人分道進討俘斬百六十
餘

十五年左州土人韋廣隆作亂伏誅

是年秋九月黃鏐黨偽為官文書釋鏐鏐越獄逃歸據
西鄉以叛南鄉土民從之寇掠州境次年春大軍至罪

人未得

十六年冬十月田州府土官岑猛糾諸土官岑璋羅武傑沈貴等攻泗城州

世宗嘉靖元年春東蘭州土目韋正西作亂知府王顯高以兵擒而誅之

田州府總管黃志威招撫奉義等州一百十七處人民皆來款附

荔浦縣賊潘公銀等流劫桂林陽朔等處殺桂林主簿

曹時古田典史陳祚巡撫官以聞兵部言都指揮同知吳啟宗左布政王啟按察司張祐等失於提調宜逮問上特命宥之

廣西蠻賊梁公當等數千人寇掠臨桂等州縣鎮守太監傅倫以聞時巡撫張瑄久未抵任總兵朱麒副總兵張祐皆因循觀望左右兩江兵驕鷙不受調上命降勅切責麒等

八月廣西夷目黃鏐等作亂先是上思州舊為土官治

所中更設流官土人嘗為亂鏐等聚眾攻州欲奪其印
都御史林廷選捕鏐下潯州府獄已而越獄復率眾攻
州官軍禦之乃詐降副將張祐不為備鏐復攻破州城
守臣走巡撫張嶺等以狀聞并陳督兵會勦之策兵部
議報可仍命巡按御史查先年致鏐縱脫者逮治嶺遣
官軍討之鏐遂走匿生漆山官軍搜獲檻送三府妻子
盡擒并斬賊黨無算鏐死於獄仍棄市州境遂平

二年廣西融縣盜周克亮等嘯聚萬餘僭署名號流劫

鄉落總督都御史張嶺以聞部覆勅嶺徵兵剿平久之
乃平

四年賀縣樊家屯等巢賊黃公壑等越蒼梧封川德慶
高要等州縣流劫時右都御史姚鏌方討田州師還發
五千人由間道出賊不意擊之俘斬七百八十名顯

思恩府叛目劉召搆亂提督都御史盛應期遣官軍討
平之

五年夏四月提督都御史姚鏌等率兵討田州破工堯

岑猛竄歸順死其子邦彥亦死

七年春二月提督尚書王守仁將湖廣江西廣東廣西
兵撫平思田目兵盧蘓王受等改田州府為田寧

夏五月總督兩廣新建伯王守仁討斷藤峽八寨賊悉
平之

八年府江樊家屯等賊相繼起勢大猖獗兩廣都御史
林富令副總兵李琮鵬剿俘獲千餘級地方就寧

九年春二月林富等遣將分剿石硯斷藤峽七都板塘

古雅古風俘馘有差諸巢悉平

南寧黃本黃達黃術偕頭目陸寶作亂知州王熊兆率
兵掩本擒之十年達術寶後先就擒

嘉靖十一年兩廣盜賊蜂起在辛卯歲計九十七羣趙
林花據陽春西山攻陷高州府及茂名縣掠庫帑巡撫
林富落俸黎文貴劫鬱林州許折桂劫海濱皆未擒總
兵仇鸞以盜息聞科官張潤身劾其欺罔並諸將曠職

宜黜本兵僅議奪俸

支大綸永
陵編年史

十二年古田興寧蠻亂提督兩廣僉都御史陶諧總兵咸寧侯仇鸞討平之

十三年八月鎮安岑金寶詐為岑濬遺子糾頭目盧平倡亂入寇思恩府督九司兵剿之參將沈希儀誘金寶至柳州殺之衆皆潰散

十八年大師征斷藤峽諸蠻悉平之

十二月土目盧回劉現等構亂都御史蔡經督副參兵備官招安之

十九年二月思恩叛目盧回等逐出九司來犯武緣縣境總兵張經擊之我師敗白骨暴野

二十一年五月提督兩廣蔡經等討思恩九司之亂平之先是思恩軍民府既改流官分設九巡檢司用土目分理之興隆司土巡檢潘良者貪淫殘虐為衆所怨恨土民劉憲盧回等因誘衆作亂聲稱欲盡除九司官復流為土勢頗猖獗經會總兵安遠侯柳珣議遣副總兵張經參政翁萬達等督田州各土官剿之副使陳茂義

撫輯其衆三千餘人至是且三年九司悉平巡按御史何瓚勘上功次詔經珣賜勅獎勵仍各賞銀幣有差是年容縣塘仲山猺作亂劫掠六王等村千戶覃德玉等捕斬之

二十三年八月初七日寇潛入城盜宣化縣庫殺守堂夫役三人事聞撫按責官軍賠補罰罪有差

二十四年賀縣弓山螺石黃尚等巢賊首倪仲亮鄧良朝梁榮聚衆數千與連山縣巢賊合謀僭稱名號大肆

焚掠兩廣都御史張岳與平江伯陳圭調集漢達官軍
土兵八萬分道夾攻斬首三千餘級連賀二縣俱平

七月廣西巡撫張岳奏獐賊竊發廣東則有封川縣蘓
松樂等廣西則有馬平來賓二縣覃朝鮮等各肆擄掠
敵殺官軍封川尤急請亟進兵殲滅之上曰獐賊肆逆
如議剿絕毋得濫及無辜參將守巡等官平日防範不
嚴俱令戴罪殺賊通候事寧之日具奏定奪

二十五年六月巡按廣西御史馮彬言廣西之患莫甚

猺獞與其召募以防賊不若召募以剿賊據其巢耕其
土凡賊之美田肥土我兵無不願得之者因其願而令
之蔑不勝矣部議廣西一省狼人居其半其三猺人其
二居民以區區二分之民介蠻獠之中事難猝舉且免
差應調土狼積習今日應募以平之者安知他日不各
據其地轉而為賊乎宜下撫按議從之

八月岑瑄構亂思恩府督九司目兵擒殺之

三十年南丹州目民莫葦以罪伏誅

是年永定長官韋啟邦劫庫越七年知府秦檉計除之
三十一年六月朔宣化太平六圖民馬喜蘭者偽稱黃
鏐男天錫糾西鄉林舉等據寨佛子攻州城陷經歷黃
相負印奔通州密議老人銀銓黃憲赴遷隆尙請兵援
之黃綏佯許逗遛不進後聞本府渠樂木旻李子昌同
本州陵俊等合兵攻擊賊已敗城已復綏始引兵百餘
過佛子遇鄉兵殺獲首級奪為己功申報軍門冒賞見
西鄉民逃竄乘機占上中那勾等八村州人憤之每年

爭競不止

是年督府應擯遣參將王寵朱昇征七山賊擒斬二百餘人籍其田廬

十月提督兵部侍郎應擯總兵官鎮遠侯顧寰討陽朔莊頭鬼子諸巢克之

是年古田蠻賊梯牆劫靈川不果入明年十一月二十九日由南門越城劫靈川庫縱火焚庫房并劫醫學印以去

三十二年八月廣西桂林平樂徭獍據險肆亂殺知縣張士毅傷百戶曹恩焚劫歲無虛月總督應檟檄總兵官顧寰督兵進剿凡擒斬四百八十四俘獲男女三百四十牛馬器械甚衆守臣以捷聞並上僉事茅坤參將王寵朱昇都指揮鍾坤秀參政張謙百戶吳通等功狀上嘉諸臣勞績命檟廕一子餘陞賞有差

是年七山徭酋盤宗昌叛分守鄭綱討平之

三十三年八月初七夜八寨強賊越南寧城梯入府劫

庫殺死巡風吏一名守堂民役三人及旦官軍追逐過
高峯至武緣葛墟散入八寨事聞撫按責官軍賠補仍
奏聞降調官軍罰罪有差

十月總督兵部侍郎鮑象賢遣將討慶遠忻城皂嶺
板荒龍樓東歐等村巢賊平之

三十四年十二月三十夜八寨賊復寇入南寧城斬關
欲劫府庫時巡捕指揮李光勇敢單騎督率軍兵衝突
射傷賊衆潰散走遁八寨府庫軍兵賴以無虞

三十九年八寨賊吳宗顯等襲容縣掠帑金去署縣者

蒼梧縣丞曾鳳儀率副千戶杜凌雲追至水源洞心山

擒宗顯等奪金歸

鳳儀以功擢令古田

四十年八月二十夜八寨賊復越城劫宣化縣庫殺死

守城軍役二十一人次早官軍追捕至關山高峰英墟

諸路入八寨事聞撫按責官軍賠補罰罪有差

四十三年十二月廣西古田鳳凰山賊韋銀豹等自永

福突桂林乘夜縋城而入進劫布政司庫殺署印參政

黎民衷劫庫銀四萬餘兩及金珠各若干仍絕原道去
提督侍郎吳桂芳奏總兵王寵等失事狀詔降有差

四十四年春正月靈川僮伏南郊三里執署縣事布政
司照磨曾傳繫之并持印去勒贖銀三十兩及還所俘
子女五人乃獲歸

秋八月夜古田賊復入城劫布政司并靖江府攻門未
入而奔官兵追捕大敗之

四十五年九月古田僮賊韋銀豹等來降時銀豹久據

古田與諸獍分其地為上下里居之銀豹兩犯省城獨
下六里人從之提督軍務吳桂芳因其間遣典史廖
元入上四里諭降諸獍諸獍復業者千九百餘人於是
銀豹勢孤亦請降桂芳即以古田平聞因言古田自弘
正來縣令未嘗入城今典史廖元恢復已有次第宜量
陞主簿俟其功成即擢為令詔從之

穆宗隆慶三年荔浦中崗賊韋公海等糾同上下二崗
賊五千餘四出攻劫破兵堡四民寨十七屢攻縣城聲

勢甚劇永安州榕崗古東等巢賊首李都堂等千五百
餘徒阻截道路州治不通都御史劉燾檄兵備副使應
存卓統向武奉議二州目兵以知縣劉誥指揮白玉督
戰于東村斬韋公海等連破二十五村盡燬之賊懼乃
求招撫

四年永安州榕崗賊陸公騰古巢賊潘勝喜等作亂都
御史殷正茂檄兵備副使應存卓督兵鷓勦斬首四十
七級俘獲百餘人頃之高天賊黃功東六章賊胡公選

等聚眾萬餘攻圍永安復檄總兵俞大猷平樂府同知蔡萬推官梁直領兵二萬征之斬首千餘級

五年九月磔古田僮賊韋銀豹并斬其孫扶僮于市仍傳首蠻方銀豹古田僮民其父朝威自弘治間與其伯朝猛占據縣治拒殺副總兵馬俊參議馬鎔正德間銀豹常隨朝威攻陷洛容縣朝威誅死銀豹乃挾其五子四出擄掠屢敗官軍與朝猛據鳳凰潮水二巢險固不可拔總督殷正茂與巡撫李遷謀調思明等處土兵及

漢兵共十萬令總兵俞大猷統之直抵諸巢合營進剿
凡斬首七千四百六十餘級俘獲男婦千三十餘人捷
聞上嘉三臣功陞賞有差是時銀豹實未死祇以窮蹙
陰令其黨覓肖己者斬首以獻主簿廖元把總王綱相
與證之遂以捷聞其後稍傳不死狀正茂令僉事金柱
踪跡之銀豹兄銀站乃生縛銀豹以降正茂械赴闕下
且具疏引罪上以付吏論銀豹謀反律家屬黨類下撫
臣論治命御史治元等罪遷等勿問

是年廣西府江右江諸徭獠復亂巡撫郭應聘請給兵
餉剿除之給事中梁問孟以賊黨甚衆不可盡滅宜令
守臣熟計兵部覆言府江自正德十二年都御史陳經
征討之後且六十年而右江北三北五等巢素未懲創
生齒日繁遂肆猖獗頃者大征古田各巢咸畏威斂戢
獨府江右江恃險為亂若復縱之非惟無以固八寨懷
遠之招亦恐以啟古田携貳之漸剿之便但兵在萬全
宜即以科臣所慮備行提督殷正茂及廣西撫按郭應

聘等相機行事毋貽後患其調兵給餉諸務悉聽便宜
上是之

六年府江徭復作亂以三崗仙迴高天水滄諸巢為聲
勢互相依倚煽禍流毒兩廣都御史郭應聘徵漢土官
兵六萬討之擒斬五千一百有奇俘獲稱是又上善後
之策改土司置參將通水陸處兵費設縣治分田糧六
事詔從之

神宗萬曆元年陽朔碎江賊廖金濫等起南源殘孽復

陰助之據峰門山灣等處總督郭應聘復檄參將王承恩等分道並進斬首二千餘級遂復峰門以齊凱屯守又檄參將王瑞進兵復山灣以莫棟屯守又撲榕崗巢以覃滿屯守永安修荔之民臥始帖席是歲府江徭復據林箐為行旅虞應聘復以參將王世科錢鳳翔都司董龍王承恩統兵四道並進復以副使金柱鄭茂僉事夏道南監督又以總兵李錫為大帥參政胡直理餉副使劉廷舉紀功首破三崗古西巖口東岸黃崗西岸太

平古冒等策次克平滿青龍南源等巢無大小險夷相繼俱下凡俘斬五千四十餘府江悉平

三年府江巨寇黎福莊聚黨四出時新城昭平上下四屯與大羅諸山相接五指白冒尤稱險絕福莊父子弄兵肆螫流毒遠邇時都御史吳文華方議羅旁之役調向武諸州土兵出蒼梧乃陽留向武兵為防禦計因以鷓鴣方畧密授兵備副使徐作命參將吳京攻上四屯都司韓文啟攻下四屯分布所部主客兵出其不意間

道并進福莊勢窘甚謀擒之組致戲下賊勢促入據五指白冒諸巖抗我師京督戰益急人殊死戰連克白壁板燕白馬六勒福村茅花大梁鐵釘水穿黃竹大洞斬首千餘級俘獲賊屬牛馬器械不可勝計又乘勝直擣白冒巢斬首八千級餘黨悉降乃下令寬恤修屯守之政籍賊田歸之兵籍餘田歸之民鑿石疏江刊木通道一郡志平

四年蒼梧民林思配亂尋平之老君崗諸徭亂尋撫之

五年河池州惟建里賊首韋宋武糾橫嶺賊劫殺地方
巡撫軍門吳文華勦平之

六年三月十六三山獍賊潘積善乞降許之

是年七月岑溪左營兵陳進呂子和等作亂尋討平之
七年橫嶺賊藍龍返復亂巡撫軍門張公任督指揮戚
秉忠計除之

是年十寨復亂總督軍門劉堯誨巡撫軍門張公任
發兵剿之經理其地

興業木頭尙寇亂尋討平之

八年大師征十寨蠻克之

九年三都與東歐賊擄官殺役總督軍門劉堯誨巡撫軍門郭應聘發兵勦之經理其地

十二年府江西岸徭賊復糾聚劫舟百戶劉卿遇害巡撫吳善巡按黃鍾謀於督府吳文華調漢土兵二萬六千以都督呼良朋統之命參政葉朝陽監督十二月庚午參將白玉由荔浦入遊擊童元鎮由南隘入都指揮

孫世寶由永安入守備陳邦佐由水哨入四面夾擊破賊四十餘巢斬首一千二十四級生擒賊首周惺婆等一百八名俘獲男婦以千計籍復田土以萬計二月癸亥府江平命副使韓紹伐山開道立亭障仍改設參將鎮守之

十一月懷集尚蠻嚴秀珠鄭明端等糾衆流劫討平之十五年梧州大尚營兵梁一貴等倡亂尋伏誅二十四年岑溪七山徭寇亂兵備戴燿討平之

二十九年六月五屯所軍民激變梧州知府凌嗣音撫
之

是年八月蒼藤博白四縣人民大哨梧城知府凌嗣音
安輯之

粵西叢載卷二十六

欽定四庫全書

粵西叢載卷二十七

桂林府通判汪森編

南越趙氏

南越武王趙佗真定人秦始皇初并天下略定楊越置桂林南海象郡以謫戍民與越雜處十三年以佗為南

海龍川令

即今博羅縣之東鄉

至二世時南海尉任囂病且死召

佗行南海尉事囂死佗即移檄告橫浦陽山湟谿關曰

盜兵且至急絕道聚兵自守秦已破滅即擊并桂林象

郡自立為南越武王

饒伸學
海下同

趙光

蒼梧王趙光者越王同姓聞漢兵至及越揭令自定屬漢越桂林監居翁諭甌駱屬漢皆得為侯

區憐

區憐象林蠻也漢永和丁丑四月憐等攻縣寺殺長吏交州刺史樊演發交阯九真兵萬餘人救之兵士憚遠

後反攻其府府雖擊破反者而蠻勢轉盛侍御史賈昌
與州郡討之歲餘不克戊寅閏四月帝召百官問以方
略皆議遣大將發荆揚充豫四萬人赴之李固駁議以
為勞師遠討非計也但宜選將帥以為刺史太守祝良
張喬皆可任用四府悉從固議即拜良為九真太守喬
為交阯刺史喬至開示慰誘並皆降散良到九真單車
入賊中設方略招以威信降者數萬人皆為良築起府
寺嶺外復平

李遜

東晉李遜為九真太守太元庚辰十月遜據交州反辛巳七月交阯太守杜瑗斬遜交州平

李凱

李凱交州人為梁交州刺史天監己酉春二月凱據州反長史李叟討平之

李賁

李賁交阯人世為豪右仕不得志有并韶者富於詞藻

詣選求官吏部尚書蔡樽以并姓無前賢除廣陽門郎
韶恥之責與韶還鄉里大同辛酉十二月交州刺史武
林侯諮以刻暴失衆心時責監德州因連結數州豪傑
俱反梁遣諮與高州刺史孫罔新州刺史盧子雄將兵
討之甲子正月責自稱越帝置百官改元大德乙丑六
月梁遣交州刺史楊暉討責暉以陳霸先為前鋒至交
州責帥衆拒之敗奔嘉寧城諸軍圍之中大同丙寅八
月責復帥衆自獠中出屯典澈湖衆軍憚之頓湖口不

敢進陳霸先曰我師老而無援入人心腹若戰不捷豈望生全今藉其屢奔人情未固正當決力取之諸軍皆莫應是夜江水暴起七丈注湖中霸先勒兵乘流先進衆軍鼓譟俱前賁衆大潰復竄獠中戊辰三月屈獠洞斬賁賁兄天寶收餘兵圍愛州陳霸先帥衆討平之

李光仕

李光仕桂州俚帥也開皇丁巳二月光仕作亂帝遣王世積周法尚討之光仕戰敗帥勁兵走保白石洞法尚

獲其黨降者輒以妻子還之居旬日降者數千人光仕
衆潰而走追斬之帝又遣何稠討光仕稠諭降其黨莫
宗等承制署首領為州縣官

李世賢

李世賢桂州人開皇十七年秋七月桂州作亂帝遣將
軍虞慶則討平之

李佛子

李佛子交州俚帥也仁壽二年冬十二月佛子作亂據

越王故城遣其兄子大權據龍編城其別帥李普鼎據
烏延城楊素薦劉方為總管討之至都隆嶺遇賊擊破
之進軍臨佛子營先諭以禍福佛子懼遂請降送之長
安

蕭銑

唐武德元年蕭銑即皇帝位使魯王張繡徇嶺南隋將
張鎮周王仁壽等拒之既而聞煬帝遇弒皆降於銑欽
州刺史甯長真亦以鬱林始安之地附於銑漢陽太守

馮盎以蒼梧高涼珠崖番禺之地附於林士弘銑士弘
各遣人招交趾太守丘和和不從銑遣甯長真帥嶺南
之兵自海道攻和和欲出迎之司法書佐高士廉說和
曰長真兵數雖多懸軍遠至不能持久城中勝兵足以
當之奈何望風受制於人和從之以士廉為軍司馬將
水陸諸軍逆擊破之長真僅以身免盡俘其衆既而有
驍果自江都至得煬帝函問亦以郡附於銑

資治通鑑

李思慎

李思慎嶺南俚戶也俚戶舊輸半課交趾都護劉延祐使之全輸俚戶不從延祐誅其魁首乙酉正月武后改元垂拱三年丁亥七月思慎等作亂攻破安南府城殺延祐桂州司馬曹玄靜將兵討思慎等斬之

學海
下同

歐陽倩

歐陽倩始安獠也長安癸卯十一月擁衆數萬攻陷州縣制以裴懷古為桂州都督仍充招討使懷古纔及嶺上飛書示以禍福倩等迎降且言為吏所侵逼故舉兵

自救耳懷古輕騎赴之賊衆大喜悉歸所掠貨財嶺外
悉定

梅叔焉

梅叔焉安南賊帥也開元十年八月叔焉等攻圍州縣
遣內侍楊思勗討之思勗募羣蠻子弟得兵十餘萬襲
擊大破之斬叔焉積尸為京觀而還

梁大海

梁大海邕州封陵獠也開元丙寅正月大海等據賓橫

州反二月巳酉遣內侍楊思勗發兵討之十二月思勗生擒大海等三千餘人斬首二萬級而還

梁崇牽

梁崇牽嶺南蠻酋也大厯辛亥二月崇牽自稱平南十道大都統據容州與西原蠻張侯夏永等連兵攻陷城邑前容管經略使元結等皆寄治蒼梧經略使王翊至藤州以私財募兵不數月斬賊帥歐陽珪馳詣廣州見節度使李勉請兵以復容州勉以為難翊曰大夫如未

暇出兵但乞移牒諸州揚言出千兵來援冀藉聲勢亦可成功勉從之翊乃與義州刺史陳仁瓘藤州刺史李曉庭等結盟討賊翊募得三千餘人破賊數萬攻容州拔之擒梁崇牽盡復容州故地分命諸將襲西原蠻復鬱林等諸州先是番禺賊帥馮崇道桂州叛將朱濟時皆據險為亂陷十餘州官軍討之連年不克李勉遣其將李觀與翊并力攻討悉斬之三月五嶺皆平

覃問

覃問西原賊帥也大厯癸丑九月循州刺史哥舒晃據嶺南反詔嶺南節度使路嗣恭討晃容管經略使王翽遣將將兵助之問乘虛襲容州翽伏兵擊擒之

黃少卿

黃少卿欽州蠻酋也貞元甲戌五月少卿反圍州城邕管經略使公孫器請發嶺南兵救之上不許遣中使諭解之八月少卿陷欽橫潯貴等州攻公孫器於邕州憲宗元和戊子五月少卿請降以為歸順州刺史少卿雖

降而數反覆已亥十月桂管觀察使裴行立容管經略使陽旻欲徼幸立功爭請討之上從之嶺南節度使孔戣屢諫曰此禽獸耳但可自計利害不足與論是非上不聽大發江湖兵會容桂二管入討士卒被瘴癘死者不可勝計行立旻竟無功庚子正月穆宗即位十二月國子祭酒韓愈上言黃家賊居無城郭依山傍險尋常亦各營生急則屯聚相保比緣邕管經略使多不得入德既不能綏懷威又不能臨制侵欺鹵縛以致怨恨遂

攻劫州縣侵暴平人或聚或散終亦不能為事近者裴
行立陽旻意在邀功獻計征討邕容兩管經此凋弊殺
傷疾疫十室九空如此不已臣恐嶺南未得寧息兼此
賊徒亦甚傷損察其情理厭苦必深若因改元大慶赦
其罪戾遣使宣諭必望風降伏仍為選擇有威信者為
經略使處置得宜自無侵叛上不能用

劉士政

劉士政初為安州指揮使乾寧乙卯冬安州防禦使家

晟與朱全忠親吏蔣玄暉有隙恐及禍乃與士政及兵馬監押陳可璠將兵三千襲桂州殺經畧使周元靜而代之晟醉侮可璠可璠手刃之推士政知軍府事可璠自為副使詔即以士政為經畧使庚申賜桂管軍號曰靜江陞士政為節度使是年十月士政聞湖南馬殷悉平嶺北大懼遣陳可璠屯全義嶺在桂州東北一百五十里以備之殷遣使修好於士政可璠拒之殷遣其將秦彥暉李瓊等將兵七千擊士政湖南軍至全義士政又遣指揮使

王建武屯秦城

在桂林城北八十里相傳為秦戍五嶺地

可璠掠縣民耕牛

以犒軍縣民怨之請為湖南鄉導曰此西南有小徑距

秦城纔五十里僅通單騎彥暉遣李瓊將騎六十步兵

三百襲秦城中宵踰垣而入擒王建武比明復還紿之

以練造可璠壁下示之可璠猶未之信斬其首投壁中

桂人震恐瓊因勒兵擊之擒可璠降其將士二千皆殺

之自秦城以南二十餘壁皆望風奔潰遂圍桂州數日

士政出降桂宜巖象柳五州皆降於湖南士政據桂州

凡五年

王季元

王季元安南牙將也貞元癸未二月己亥季元逐其觀察使裴泰泰奔朱鷺明日左兵馬使趙旬斬季元及其黨迎泰而復之

楊清安南賊也安南都護李象古以貪縱苛刻失衆心清世為蠻酋象古名為牙將清鬱鬱不得志貞元十四年己亥象古命清將兵三千討黃洞蠻清因人心怨怒

引兵夜還襲府城陷之殺象古及妻子官屬部曲千餘人詔以桂仲武為安南都護赦楊清以為瓊州刺史庚子正月桂仲武至安南清拒境不納清用刑慘虐其黨離心仲武遣人說其酋豪數月間降者相繼得兵七千餘人朝廷以仲武為逗遛貶安州刺史以桂管觀察使裴行立為安南都護三月辛未安南將士開城納仲武執清斬之裴行立至海門而卒復以桂仲武為安南都護

龐勛

龐勛徐州人初為桂州糧料判官初南詔陷安南敕徐
泗募兵二千赴援分八百人別戍桂州初約三年一代
徐泗觀察使崔彥曾性險刻朝廷以徐兵驕命鎮之都
押牙尹戡教練使杜璋兵馬使徐行儉用事軍中怨之
戍桂州者已六年屢求代還戡言於彥曾以軍幣空虛
發兵所費頗多請更留戍卒一年彥曾從之戍卒聞之
怒都虞侯許佶軍校趙可立姚周張行實皆故徐州羣

盜州縣不能討招出之補牙職會桂管觀察使李叢移
湖南新使未至咸通戊子秋七月許佶等作亂殺都將
王仲甫推糧料判官龐勛為主劫庫兵北還所過剽掠
州縣莫能禦

陳彥謙

陳彥謙桂陽賊也廣明庚子謙陷柳州殺刺史董岳

南漢劉氏

劉謙為廣州牙將唐乾符五年黃巢破廣州去掠湖湘

間廣州表謙封州刺史賀江鎮過使以禦梧桂以西歲餘有兵萬人戰艦百餘艘謙三子白隱台巖謙卒隱居喪於賀江土民百餘人謀亂隱一夕盡誅之

盧成均

盧成均為宜州判官景德丁未六月知宜州劉承規御下嚴酷軍校陳進因衆怨鼓譟殺承規推成均為首僭號南平王據城反陷柳州進圍象州詔以曹利用為廣南安撫使帥兵討之至象州擊進斬之成均率其族來

降進黨陷貴州利用追討悉平之

歐希範

歐希範宜州蠻也慶曆甲申三月希範作亂討平之

儂智高

儂智高發三解不得志遂起兵兩廣遂有兩解試攝官
之格張元因殿試落第徑往西夏自此殿試無黜落之

士 張端義
貴耳集

曹成

曹成江漢間羣盜也紹興元年辛亥十二月成初陷漢陽鄂州屯攸縣湖東安撫使向子諲招之成聽命子諲遣兵扼衡陽欲圖之而援兵不至成忿子諲扼已即擁衆而南官軍悉潰成大掠執子諲而去詔岳飛等討之壬子四月成擁衆十餘萬由江西歷湖湘據道賀二州命岳飛權荆湖東路安撫都總管知潭州付金字牌黃旗招成成聞飛至驚曰岳家軍來矣即遁飛追至賀州力戰大破之成乃自桂嶺置砦至北藏嶺連控隘道以

衆十餘萬守蓬頭嶺飛部千人一鼓登嶺破其衆成奔
連州飛謂部將張憲徐慶王貴曰成黨散去追而殺之
則脇從者可憫縱之則復聚為盜今遣若等誅其首而
撫其衆於是憲自賀連慶自邵道貴自柳桂招降者二
萬與飛會連州進討成走入邵州五月韓世忠既平范
汝為旋師永嘉若將休息者忽由處信徑至豫章連營
江濱數十里羣賊不虞其至大驚世忠因使董叔招成
成方為岳飛所追乃率衆降得戰士八萬遣詣行在

學海

李接

李接廣西妖賊也淳熙己亥六月接破鬱林州守臣李
端卿棄城遁圍化州命經略司討捕之端卿梅州編管
庚子正月劉焯討接平之

學海
下同

黃聖許

黃聖許廣西上思州土官也元至正二十九年壬辰閏
六月聖許擁衆二萬結交趾為援寇陷忠州江州及華
陽諸縣詔遣程鵬飛討之聖許敗走入交趾

蔣丙何仁甫

蔣丙何仁甫道州民至正辛巳十二月丙仁甫等相繼舉兵攻破江華等州縣溪峒徭民二百餘寨亦相率入邊抄掠山東燕南寇亦縱橫至三百餘處壬午九月湖廣行省平章鞏下班擒道州賀州徭賊首唐大二蔣仁五至京師誅之丙自號順天王攻破連桂二州

荔浦周文昌

明洪武三十一年荔浦周文昌作亂劫殺四鄉九里居

民死之按文昌荔浦甘棠寨編民素陵轢里閭居民側
日時縣中以事逮繫獄中既復資緣脫身遠遁縣益連
坐族戚捕械急遂聚衆為亂前後之民響應者以千計
大肆劫殺十有餘年村落民相枕藉死者蓋十之七焉
至永樂中始興師征勦文昌勢日蹙自刎死死之先二
日投入其姊之家謂之曰予今日事勢已窮必死乃可
然無死於兵之手也汝可殺牛為予訣姊如其言果殺
一牛文昌竟七肉啗牛之半飲斗酒斗飯畢乃與姊辭

曰予今出而向兵誓殺數十人殉死乃瞑目耳果出與
兵遇手刃數人乃自刎死

荔浦
縣志

思明府黃球

黃鉢瑯嫡子也瑯請老以庶子鈞襲鉢怨問計於叔丘
溫衛指揮玠與子震聚兵圍府執瑯鈞及族目冢丁盡
殺之事聞命提督侍郎李棠巡按御史張瀾捕鉢玠下
潯州獄鉢死玠獲免初黃震與子紹走龍州成化四年
都御史韓雍遣太平知府郭本捕震誅之十二年黃紹

復攻思明州奪長子文昌二十年破下石西州奪次子
文盛弘治六年破工石西州奪季子文華九年閏三月
密遣陸光等鳩殺鈞之孫府官男光燮十一月又遣趙
保安等刺殺光燮父知府黃道遂據府治督府遣兵捕
之十一年紹糾忠州土官黃鏹拒敵尋鳩殺道妻趙副
總兵歐磐率官軍討破之擒斬無算紹懼願降督府遣
官戒諭不聽復叛十五年官軍捕急紹仰藥死文昌仍
擅遷思明州治於况村築城以拒文華據所得州如故

十八年文昌等忿復連年劫掠督府遣副總兵康泰參政楊茂元等率兵致討遣恩城州土官趙忠順計擒文昌文盛文榮等詣軍門咸寘諸法自錄至文昌叛凡四

世皆誅

通志

田州呂趙

岑紹襲為田州知府天順三年紹老傳嫡子鏞而州目呂趙挾紹庶子鑑拒紹而逐鏞於外時官府暫令鏞寄住省城令鑑襲其職趙於是縱兵攻破鎮安奉議南丹

等州上隆恩城並受其害擅為鐵鉤弔掛之刑與販私
鹽偽稱名號私通交趾復夜殺鑑既而鑑子玪亦故趙
遂以幼孫呂嬰冒玪名而襲其職副都御史葉盛會兵
討執趙伏誅令鏞襲父職鏞死子溥襲

學海

田州岑獠

初岑溥生子三長獠次獅季猛溥以猛似已且母有寵
遂屬意於猛獠竟失愛是月督府遣官至田州徵土兵
從征溥以望日率諸目兵登戰艦操於江中是夜遂止

宿馬諸部戰艦凡百艘圍護獠密遣其僕梁橋持刃引
黨數人乘小舟偽為巡漚方熟寐梁橋低聲謂侍婢
云汝諸人欲得丈夫否諸婢莫知所以微笑詰橋橋云
小主人命我行事汝若噤聲他日當配以美丈夫同享
富貴否則殺之諸婢股慄莫敢呼噉橋遂登艦弑漚于
帳中詰旦漚母岑氏執諸婢考訊始語其故岑氏令驥
等以兵縛獠與橋並殺之盡誅其黨

通志

思恩土官岑濬

濬本土官頗涉書史知吟咏但狡黠克狠左右少有過
失動遭殺戮積威所劫部下甚憚之是以兵力雄于右
江濬益驕蹇無忌弘治六年三府奏以遷江千戶所舊
轄八寨賊峒界治之濬乃築周安堡以頭目黎端率兵
屯守屢遣兵寇賓州上林遷江武緣諸州縣民村是年
九月田州府土官岑溥長子獠失愛令其僕梁橋殺溥
江中府目黃驥乃誅獠橋遂與府目李蠻爭權構兵讎
殺十月黃驥侍溥母岑氏及溥季子猛赴三府愬尋以

猛襲溥官遣官送還府黃驥復誘猛奔梧誣愬李蠻謀
叛以兵拒猛督府復遣官送猛至賓州兵備副使汪溥
檄濬以兵衛猛濬遂用黃驥詭謀以兵逆猛入思恩脇
與黃驥立券分地以耐厥勞發兵偕驥送猛歸府因欲
襲殺李蠻蠻知之以兵拒之于工堯驥以猛復歸思恩
猛祖母岑氏慮猛為濬所圖愬於總督都御史鄧廷瓚
十一年遣官取猛濬不發踰月再遣副總兵歐磐布政
程廷珙往徵之濬始送猛出詣三府令暫寓省城濬與

猛自是構讎矣是年六月濬于田州丹良甃城屯兵權
客舟駭貨遏公使勿令入田州七月乃與黃驥等統兵
五萬糾泗城州土官岑應破田州李蠻走濬殺擄無算
八月督府遣官至兵始散十一月副總兵歐磐副使雷
士梅等以兵衛猛回府追勘濬所奪地土印記及撤所
甃丹良石城濬弗聽十二年濬於夸江造戰艦三百餘
艘其祖父所出報効甲兵三千俱不奉調自是屢寇田
州所轄恩城果化上林等州縣十五年十月又率八寨

述崑鄉兵二萬餘人破工堯陷田州殺擄無算岑猛走
免十六年寇慶遠府永定永順二長官司奪據其地復
甃都陽等寨石城十有八所是年七月又破工堯九月
破田州岑猛以數騎奔歸順州濬檀廢猛官署以土族
岑洪為知府俘猛祖母暨妻子婦女凡百二十九人送
思恩府幽于別室殺戮府境兵民男婦無算仍遣兵直
抵歸順追猛傳檄左江養利諸州暴猛罪狀令勿納且
令相為犄角時守臣屢疏濬惡請兵討之濬乃托岑業

覃允夤緣行賄以緩師期尋發兵四出據守要害督府遣官戒諭濬匿不出見十七年總督都御史潘蕃等官暴濬罪惡疏上詔下朝堂議處兵部奏准調湖兵一萬行都御史潘蕃等征之於是以十八年正月進兵克諸關隘濬走舊城副使姜瑄管率兵圍之濬自經死函首詣三府臬諸市遷其母孫兄弟於福之懷安妻妾子女械送京入功臣家為奴而以思恩改流焉

通志

覃扶照

荔浦自周文昌之亂田地多荒居民鮮少永樂初招募
撞夷入土墾耕生齒漸繁弘治八年峒賊覃扶照藍公
王者自號為飛天過海聚衆為亂殺絕永蘇里秉信一
里居民蔓延至正德嘉隆之季永為地方大患者皆撞

夷云

荔浦縣志

周克亮

廣西馬平賊周克亮嘗伐藤山中當大蛇咒曰他日貴
者蛇却行咒畢蛇卷身退而其妻照水有金花插頭上

克亮戒勿泄然喜自負嘉靖元年馬平饑克亮與從凡盜礦無所得遂反僭署名號散劫馬平諸縣界得數萬人總督都御史張嶺以聞遂命嶺勦之數月平

後監錄

田州土官岑猛

自岑濬與猛構釁濬既誅猛降福建平海千戶正德初猛賂太監劉瑾矯詔以猛為田州府同知猛撫遺民兵威復震正德壬申發其兵至江右撫之東鄉饒之桃源皆劇盜也猛以兵滅東鄉之盜納桃源之賄陰使盜逸

去殺平人以報功猛受賞還田桃源之賊復起殺副使
李清執參政吳廷舉莫不歸罪於猛猛既輦華林東鄉
桃源諸盜之金帛以億萬計自是富甲兩江兵勢益銳
猛遂屠龍州殺土官知州趙相之二子又攻泗城州殺
知州岑接屠戮甚慘又殺歸德知州王通又強立泗城
州官族岑誅始毒死參將甘霖又毒死指揮方震又毒
死通判龍進始結劉瑾中結宸濠包藏禍心自雄一方
上思州土目王料之判思恩府土目劉召之叛猛皆陰

主之而陽出兵征討軍門省諭猛若不聞遇有調遣偃
蹇不聽節制凡諸土兵之進止多寡遲速皆聽命於猛
而不知有軍門之號令者六七年矣巡按御史張鉞明
其罪狀既而御史汪淵謝汝儀相繼奏之都御史張嶺
盛應期太監鄭潤總兵官朱麟亦奏之猛於上隆州武
龍州安德州舊田州皆殺其守令毀其印為銃而刻牙
代之凡慶賀貢獻之類則以印章署舊守令名以行此
其罪不可勝數嘉靖四年都御史盛應期疏請征之應

期去都御史姚鏞代之再疏請征詔下兵部議從之於是會同總鎮太監鄭潤總兵撫寧侯朱麟督率副參等官以五年四月分哨統兵進剿首破工堯斬其惡目陸綬等數人猛竄于歸順鳩死傳首南寧磔于市其子邦

彥亦竄死山中

雷禮

岑猛奔歸順州知州岑璋誅之璋猛婦翁也初猛聞大軍至抗兵自固督府姚公鏞將進兵患璋以姻故黨之召沈希儀計事希儀知璋以女失愛故憾猛而干戶趙

臣者雅與璋善名臣策之臣曰鎮安世與歸順為讎公第遣臣徵兵鎮安臣間道過璋佯以好故泄語璋要領可得也希儀曰善乃遣臣檄鎮安兵臣過璋所璋喜迎臣曰久不見故人今肯念我來邪臣不言佯為不懌者璋叩之不答頃之復太息璋疑之明日璋置酒款臣臣愈不懌若沉思者璋疑益甚問故曰軍門有意督過我邪鄰壤有所訴且逮勘邪臣皆不應因挽臣入卧内跪叩之臣泣下璋亦泣臣曰託君肺腑有急不忍隱然君

不死則臣死矣督府討田州謂君猛婦翁必黨猛命臣
檄鎮安兵襲君我不言則君死我言之君為自脫計臣
以洩機死矣璋頓首曰君實生我不言我死不悟也猛
奴視吾女吾欲圖之久矣臣曰君誠有此意盍自列於
督府璋乃留臣遣人馳詣希儀願擒猛自效希儀佯追
臣返以其事白督府乃不備璋督兵專逼猛猛子邦彥
守工堯隘璋遣千人助之實為間也璋密報希儀曰已
遣千人內應衣別有識幸勿加戮及戰歸順兵先呼敗

田兵驚潰希儀遂斬邦彥猛窮欲出奔璋使人招之曰
事急矣願君走歸順可達安南再圖興復猛倉卒無所
之又以姻故遂走歸順璋涕泣迎猛館別墅辟田州人
無得近者而報兵退以寬猛一日謂猛曰天兵雖退非
陳奏事不得白為君草封事令人上之何如猛曰固所
願也乃為疏令猛出印印之璋知印所在乃持鴆酒一
盃獻猛曰天兵索君急不能相庇也猛大怒曰悔墮此
老姦計遂飲鴆死璋斬其首併所佩印遣使間道馳詣

督府上之撤兵還內臣鄭潤總兵朱麒各以猛中毒矢
死斬其首印搆獲聞而璋與趙臣之功皆不著璋恚恨
遂遜職於其子璵而託之辟穀黃冠以老

西事珥
下同

田叔未言粵事謂書生無遠略有司恠小費急則倉皇
漫許已則避泥食言威令不行於土司十九類此瑣瑣
戚戚興讒參嫉覲面不顧寧恤軍計又曰察察汶汶罔
上遂私墨者以章賂敗類賢者以避嫌養名承勘展轉
摘疵文致徵兵禦宄甘言餽誘罷役論功變顏食約長

傲誨侮此其魁尤迨乎逆節滋萌僵屍喋血莫敢草薶
徒以文移案驗虛相叱咤安可弭也予細徵舊事三復
斯言大都以貪啟釁以輕聽舉事以反覆猥僿失夷心
語曰衣與繆與不女聊又曰何以怒許不與推揆亂本
固不在夷撲此熾彼又何怪焉

國家以土官治南蠻固周人疆以戎索之意自韓襄毅
之後而軍門號令漸已不張岑猛倚強跋扈罪誠有之
誅其君而弔其民誰曰不可乃以私望當猛大逆何以

服其心也盧蘇倡亂抗敗王師雖八議不宥新建受鉞
專征顧以姑息訖事且猛實伏誅而疏言病死蘇大慙
漏網而盛稱其功此何解也迨乎盧蘇再叛犯諸夸之
怒陶諧不能討而蔽奸罔上以失衆心彼其人寧復顧

國家大體哉

炎徽
紀聞

盧蘓

嘉靖十三年九月田州土酋弒其主岑邦相邦相為田
州判官年纔十五六副總兵張祐以兒子畜之盧蘇專

制生殺威行部中邦相擁虛位而已遂與盧蘇有隙祐
任滿將求代意邦相餞贖必腆比行邦相治具供帳僅
值二百金祐大怒下撻邦相遂與蘇比搜得岑邦彥之
子曰芝甫髻亂祐育之別室邦相時時欲購殺之會祐
不果代留鎮得免已督府以西山之役檄祐從征祐遂
置芝衣篋以行邦相覺追捕不及祐以芝奔梧州都御
史陶諧亦兒子畜之時時名飲食蘇遣其黨黃對刺邦
相弗克邦相遂與土目羅玉戴慶謀伐蘇蘇覺之稱疾

不出會其妻生日諸土目率妻子來賀遂入問疾蘇伏
甲寢中謂諸土目曰賴公等之靈疾苦何足恤惟旦夕
首領不保諸土目曰何故出此言一州之人誰不同心
蘇因指玉慶謂諸土目曰公等雖同心如二豎何言訖
而甲興執玉慶座中斬之即以甲士千人劫諸土目偕
攻邦相執而囚之至是弒之焚其屍行賂陶諧言邦相
病死無後芝當敘立諧遂縱芝歸田州寢其事不問於
是岑猛仲子邦佐爭立而鎮安府土舍岑真寶泗城州

土舍岑施東蘭州土舍岑起雲那地州土舍羅廷鳳等
咸憤蘇以僕弑主也合兵討邦佐攻田州入之蘇走免
歸順州土舍岑歟蘇壻也蘇急求救於歟歟遂乘虛擣
鎮安真實聞之引兵去蘇追躡擊之真實大敗精兵死
者八千人兩江大駭諧乃遣人諭真實等曰邦相實病
死何與盧蘇而爾等自相魚肉何也會諧以憂去都御
史潘旦蔡經相繼代之咸不欲反諧前議將以邦相病
死聞且曰田州肆孽遞起黎民塗炭府藏空虛假令朝

廷復以盧蘇故問罪興師嶺右之禍安可救也於是副
使蕭晚參議陳大珮當勘議曰盧蘇稱亂弑主戕民罪
惡通天安可益也今日之事第當直敘以聞乞令立功
自贖不及征討足矣督府不聽遂言邦相不孝奪其母
贍田虐部下盧蘇因衆怨而殺之朝議果置不聞

典
彙

粵西叢載卷二十七